

15 JAN 2003

Shahidan-Larangan

LARANGAN REMAJA KELUAR MALAM TINGKATKAN KASIH SAYANG KELUARGA

KANGAR, 15 Jan (Bernama) -- Menteri Besar Perlis Datuk Seri Shahidan Kassim berkata cadangan kerajaan negeri untuk mengenakan larangan terhadap remaja yang mengunjungi tempat hiburan selepas pukul 10 malam adalah bertujuan meningkatkan kasih sayang keluarga.

Menurutnya, jika remaja sering berada bersama keluarga sama ada di rumah atau di luar rumah, ia secara tidak langsung akan mengukuhkan institusi keluarga berkenaan.

Bercakap kepada para pemberita di pejabatnya di sini hari ini, Shahidan melahirkan rasa kecewa sebab cadangan itu dilihat negatif oleh pihak tertentu sedangkan ia bertujuan baik.

"Kerajaan negeri mahu remaja terutama yang berusia bawah 17 tahun berada di rumah pada waktu malam jika tidak ada aktiviti seperti kelas tuisyen," katanya.

Langkah itu, menurutnya bukan sahaja dapat membendung gejala sosial yang negatif di kalangan remaja tetapi mengeratkan hubungan dalam keluarga.

Mengenai permintaan Perdana Menteri Datuk Seri Dr Mahathir Mohamad supaya kerajaan-kerajaan negeri mewartakan undang-undang keluarga Islam secepat mungkin, Shahidan berkata, Perlis menerima pakai hampir semua kandungan undang-undang itu.

Katanya, beliau tidak mahu mengulas panjang mengenai perkara itu sebab semalam Perdana Menteri telah memberi penjelasan beliau termasuk mengenai soal poligami.

-- BERNAMA

AD HM